

A celebra inicio di proyecto 'Museo Nacional Aruba'

ORANJESTAD- Diamars atardi dia 28 di maart, a celebra e comienso di e proyecto 'Museo Nacional Aruba' pa ubica Museo Arqueologico Aruba (MAA) den edificionan historico den Schelpstraat. Dilanti di e edificionan aki a tuma lugar un bunita ceremonia pa celebra e ocasion special aki. E invitado di honor sr. Per Eklund, embahador di Union Europeo, como tambe Minister di Labor, Cultura y Deporte sr. Ramon Lee a muestra riba e balor grandi, tanto nacional y internacional, di e proyecto aki pa Aruba. Nunca antes den historia di nos isla a logra haya asina hopi sosten financiero pa un solo proyecto cultural. E Museo Nacional Aruba lo bira un joya den region Caribense cu ta inclui 600 meter cuadra di espacio pa exposicion, un area apart pa educacion, un centro pa documentacion pa tur esnan cu ta haci investigacion riba nos herencia arqueologico, e depositario y laboratorio mas moderno pa investigacion

cientifico, un restaurante y un 'souvenir shop'. E proyecto aki riba su turno lo stimula otro proyectonan di restauracion y cultural den su bicindario. E edificionan 'Ecury', cu ta inclui e cas di nacemento di nos heroe nacional sr. Boy Ecury, tin un significacion special pa nos comunidad y ta un lugar digno di conserva y expone nos herencia arqueologico pa nos generacion futuro. E realizacion di e proyecto aki tabata solamente posibel door di e sosten di hopi persona y instancianan. Cu e sosten financiero di e Fondo Europeo pa Desarrollo, Gobierno di Aruba y UNOCA un soño ta birando realidad. Cu un ceremonia simbolico, narra pa sr. Ruben Trapenberg y bou di direccion di sr. John Freddy Montoya, a honra e pioneronan, representa pa sra. Marlene van Blarcum y sr. Evelino Fingal, cu a inicia e proyecto aki 15 aña pasa como tanto e generacion actual, cu a persigui e soño di tanto aña aki pa duna MAA un cas den e edificionan historico

di Ecury.

E generacion futuro, representa dor di e tres hoben, Thialah Angela, Cindy Croes y Stacy-Ann Trapenberg, desde nan prome pasonan a participa na actividadnan di MAA. Nan a ofrece un 'safety-helm' na sr. Per Eklund, embahador di Union Europeo, na sr. Ramon Lee, Minister di Labor, Cultura y Deporte y na sra. Maria Dijkhoff-Pita, como representante di Minister di Financia y Asuntonan Economico, como un regalo simbolico pa esnan responsabel pa e proyecto di construccion y restauracion aki keda realisa.

Cu un baile simbolico door di sr. John Freddy Montoya y Popcorn Dancers MAA a expresa su gratitud na tur esnan, tanto persona como instancianan, cu na un forma of otro semper a duna nan apoyo na MAA, tanto den pasado y presente y riba cual MAA sa di por conta tambe den futuro.

